

平定三逆方略

九



總校官候補中書臣潘有為

校對官中書臣李斯咏

謄錄監生臣邵延曾

欽定四庫全書

平定三逆方略卷四十一

康熙十七年九月己亥朔

初總漕帥顏保赴吉安

上諭兵部尚以江西可虞因調總漕帥顏保前往今南

昌已為內地其令帥顏保赴吉安鎮守

辛丑大將軍簡親王喇布等奏吳三桂死永興賊

簡親王喇布侍郎郭丕疏言八月二十四日據
偵報三桂初病中風噎膈有犬登其案而坐因
病甚口不能張且下痢十七日遂死賊黨匿不
發喪閉郡城門潛調偽將軍胡國柱馬寶等於
永興諸處取三桂孫於雲南越四日國柱等自
永興至衡州始啟城門通行旅將軍穆占亦奏
據護軍統領拉賽前鋒統領薩克察巴圖魯報
賊自八月初二以至二十日屢逼永興滿漢官

兵奮勇禦敵城壞于礮隨以筐及囊盛土補之
晝夜堅守屢退賊衆二十一日夜賊焚其營遁
勅諸路大兵乘機勦賊

上諭議政王等曰覽大將軍簡親王等奏逆賊吳三桂
已死渠魁既殞賊必內變諸路將軍宜乘時各統大
兵分路進勦克復疆圉永興賊既遁去簡親王宜由
茶陵赴安仁進逼衡州其永興官兵勞苦已久可駐
茶陵諸處暫息自陝西調來副都統夸岱所領每佐

領兵二人不必遣赴茶陵即留岳州軍前大將軍貝勒察尼等務水陸夾擊速取岳州

臣謹按軍事之要必相其機之所在而亟乘之則畧地攻城所向靡不克捷是時賊渠吳三桂罪積惡盈已遭天殛

皇上即料逆黨心攜必生內變乘機進師成功自易若失此事會遷延引日俾賊得徐相要結復為固守之計恐蕩定之勲未能尅期而奏爰

趣諸將分路勦擊於是在岳大兵仰遵

明詔指揮困賊愈急賊糧糗既盡遂棄城而竄岳州一
拔而羣寇果望風潰散疆土以次底定

皇上之審勢料敵應機決勝信乎為獨神矣

壬寅

命諸路將軍大臣招撫從逆人員

上諭諸路王貝勒大將軍將軍督撫提鎮等曰茲據大
將軍簡親王等報稱逆賊吳三桂頃已身斃三桂數

年以來構兵倡亂荼毒生靈罪大惡極故天命殛之
當日許其遷移本欲保全安插始終眷寵不意其包
藏禍心輒行反叛背累朝豢養之恩逞一旦鴟張之
勢橫肆克逆擾亂疆土元克既服天誅脅從宜施寬
典凡在賊中文武官員兵民人等皆朕赤子素受國
家恩養必非甘心從逆或志存忠義不能自拔或勢
被迫驅懷疑畏罪陷身逆黨朕甚憫焉其各體朕好
生之心翻然悔悟爭先來歸朕必優加恩賚論功敘

錄爾等即宣布德意廣示招徠務使懷忠抱義之士
順天命以圖全審事機而建績撫綏戡定早奏蕩平
以副朕嘉與維新至意

癸卯黜將軍華善等令從軍効力

上諭議政王等曰將軍華善署副都統多諾自六月調
遣永興迄今未至殊負厥職其集議以聞於是議政
王等議言華善多諾俱宜革職披甲令赴大將

軍簡親王軍前効力

上諭我國家將士凡遇調遣馳赴而已從未有若此遲延觀望者使華善等兵未事而至未必無功今已事畢至將安用華善多諾宜如議處分但正值討賊之際免其革職披甲俱委署夸蘭大付將軍穆占令軍前効力

已酉趣大將軍貝勒察尼取岳州調副都統關保率兵赴之

先是

上諭

親征議政王等集議應作何進兵令大將軍安親王岳樂順承郡王勒爾錦貝勒察尼詳議敷陳至是

勒爾錦奏言以守兵餘力併入行軍復多增槍手五路渡江齊力大舉庶可滅賊岳樂奏言臣

親赴岳州仍舊布置舟師調諸路大礮急攻陸營勢必克復察尼則奏言舟師入湖三月餘雖未大挫賊鋒賊亦不敢公然出戰近聞逆賊糧

餉將絕將軍林興珠又獻策謂湖水涸後宜圍
以木棧立木橋列火礮俾小船巡警可乘之機
正在此時然湖水之涸為期尚遲兩三月間賊
中安知無變今乘水勢未退立一營於南靖港
俟水涸酌撥舟師營於君山高家廟絕其糧道
賊勢窮蹙不難撲滅又一議言九貴山雖經立
營而圍猶未匝若水涸則君山高家廟諸處俱
涸賊於石首華容澧州常德陸路皆通君山高

家廟不以大隊立營則圍城難遍風浪之中船不可泊徒至壞損若於舟師分撥立營萬無餘力

上覽三疏因

諭今吳三桂已死諸逆潰變之際宜急取岳州動支如許錢糧營治舟艦入湖三月餘而將軍侯林興珠獻策甚明俟湖水盡涸我船及賊船俱無所施彼時多掣舟師無不足用我之船艦兵卒頗屬有餘豈可推諉使大事中沮今宜於南靖港君山高家廟諸處俱

立營壘斷賊糧道務須困取岳州至於君山高家廟
諸處既需大隊應令副都統關保所率之兵無徃江
西改赴岳州聽貝勒察尼調遣如舟師必難久頓湖
中速以狀聞貝勒察凡等既困取岳州安親王順承
郡王所奏俱不必行

辛亥遣刑部侍郎禪塔海造船於茶陵

大將軍簡親王喇布奏茶陵攸縣水陸俱通衡
州諸處宜造戰船及小沙船百艘備用議政王

等議如所請令勸勉紳衿百姓輸助速行營造
上諭造船事關緊要令刑部侍郎禪塔海於江南動支
正項錢糧備藥礮及需用器物前赴茶陵諸處督理
修造前尚書伊桑阿帶往造船官員仍令皆往

丁巳大將軍康親王傑書奏泉州圍解

時傑書遣署副都統禪布等進勦海逆兩路夾
擊遂敗賊衆恢復惠安解泉州圍是日福建巡
撫吳興祚奏敗賊於白鴿嶺復永春德化等縣

金定四庫全書
卷四十一
賊渠劉國軒等悉遁隨遣官兵擊海賊敗之於
赤澳諸處沉燒賊船六十餘斬六千餘級

辛酉

勅將軍穆占等遣兵守永興

先是穆占奏因華善等至郴州永興賊遁故臣

未赴永興遣副都統保住總兵官趙應奎署副

都統雅秦等各以所部兵從華善往守撤臣所

部前鋒護軍甲兵及漢軍綠旗兵盡還郴州休

息軍馬以候

諭旨已而大將軍簡親王喇布奏臣聞上三旗內府佐
領兵三百人未發永興因檄詢華善等華善等
言此兵至郴州皆願軍前効力穆占遂留之以
臣所遣之兵華善不啟臣知竟留穆占軍前穆
占亦不以留兵之事聞之於臣儻遇警急有所
調發亦皆如此恐悞軍事嗣後華善之兵或聽
穆占調遣或聽臣調遣伏候

睿裁

上諭簡親王方勦撫逆寇之際穆占盡撤其屬兵茶陵攸縣安仁諸處所存兵每佐領不足七人大將軍安親王每佐領兵二人復遣還長沙致簡親王兵力單弱遇有調遣穆占又相去甚遠誠難應時即至今簡親王赴安仁相機進勦其所部兵當聽隨宜調遣簡親王所發官兵穆占並未商酌任意留之不合其內府佐領兵三百人仍令發回至永興地方本令穆占簡

親王協同鎮守今若止令簡親王兵駐守儻簡親王
相機前進或逆賊來犯恐兵力單弱關係匪輕其令
穆占簡親王協議各酌遣官兵共守永興今逆賊吳
三桂已死正急宜勦撫之會穆占簡親王其凜遵諭
旨同心合力以圖濟事已而喇布復奏華善多諾俱
已降黜永興見缺統帥因授內大臣阿密達揚
威將軍印以夸蘭大碩塔阿進泰等副之遣往

駐鎮

上諭簡親王既赴安仁參贊不可無人阿密達仍與簡親王偕往永興去郴州不遠況穆占前奏郴州別付一大臣鎮守以便親赴永興宜令穆占或選彼處所有大臣一員往鎮永興或親往鎮守酌可而行

乙丑削副都統德業立等職留任圖功

先是賊乘船自岳州赴湘陰取糧米火藥副都統德業立提督周卜世等駐扁山不行擒獲俾賊逸出已而賊船由扁山入岳州彼等又不邀

擊縱之入城將軍鄂鼎等以

聞

上諭以如許錢糧造成船艦調集諸路官兵水陸並進以圍岳州乃賊船衝出既不行阻禦竟致逸出及其入城以如許舟師何以不行邀擊任意縱入大將軍貝勒察尼其嚴察明白具奏至是察尼奏言德業立周卜世等特率一百三十船截勦茲賊賊僅二十餘船未能獲其一艘畏縮怯懦縱賊入城議

政王等議德業立周卜世等應革職充伍令軍

前効力

上諭德業立周卜世等本宜如議處分但值勦賊之際
可俱革職留任効力贖罪鄂鼎總統舟師身為主將
乃用庸懦之徒致悞大事事平之日從重議處

丙寅尚之信請開海禁

上不許

之信奏勦除海逆亟需船艘其如公帑方匱勢

難營造請暫開海禁許商民造船由廣州至瓊
州採捕自便則臣得藉商船大創海寇由廣海
海陵龍門一帶進取以收搗巢之功

上諭向因尚之信言粵東雖已底定鄭逆仍踞廈門宜
申海禁以絕亂萌故準舊界嚴行禁戢今若開海禁
令商民採捕自便恐奸徒乘此與賊交通侵擾邊海
人民亦未可定海禁不可輕開其鼓勵地方官員捐
助造船備征勦之用

丁卯授尚之信為奮武大將軍

初將軍莽依圖奏言進定廣西亟需厚集兵力
見在綠旗之兵有名而無實臣思平南親王尚
之信練習戎行器械整備請調赴梧州統轄官
兵委以平粵之責與臣等協謀而行實於大事
有濟

上命尚之信會同將軍額楚總督金光祖巡撫金僑等
定議以聞至是之信奏臣向以逆賊偏注永興恐都

統王國棟不能制敵擬於九月初旬親往策應
項闔吳三桂已死永興賊遁今湖南勢如瓦解
取之甚易臣當進定廣西

上諭乘此逆賊驚擾之時大兵亟宜前進勦撫並用綏
定疆圉授平南親王尚之信為奮武大將軍統兵赴
永興郴州諸處會合大將軍簡親王將軍穆占等併
力同心以圖進取將軍莽依圖額楚傅宏烈總督金
光祖等各駐本汛相度機宜規定廣西應給尚之信

勅印準滿洲大將軍王等例遣內閣官員齎往

平定三逆方畧卷四十一

欽定四庫全書

平定三逆方畧卷四十二

康熙十七年十月庚午

命福建水師提督駐海澄

總督姚啟聖奏前督臣李率秦奏設水師提督
駐海澄方今水重於陸不可無總統重臣海澄
公既召赴京師漳州宜設總兵官鎮守

上諭向因水師提督駐海澄是以海逆敗遁今該督既

欽定四庫全書
卷四十二
行題請其令水師提督駐海澄調海澄總兵官駐漳
州至水師提標應設兵丁可於新增兵及所裁海澄
公標兵內選補

丙子

敕大將軍簡親王喇布帥師進討將軍穆占鎮守茶陵
初喇布奏臣等恭接招撫逆賊

敕諭即謄黃遍行粘示仍屢遣人招撫偽將軍胡國柱
夏國相馬寶等以臣觀之攸縣較安仁尤要若

前詣攸縣遣人招撫且相機而動均有裨益又
於安仁可以兼顧但遣還夸蘭大塔爾拜所領
每佐領兵二名臣屬兵力必致單弱請增發綠
旗兵

上諭簡親王身在彼地深悉情形宜如所請前往攸縣
隨宜勦撫但兵分力薄可調永興副將周球赴彼軍
前并移文總督董衛國選江西綠旗兵二千速遣詣
簡親王軍以資進勦至是穆占奏臣及簡親王孰進

孰守伏候

上裁

上諭逆渠已斃賊勢潰亂之際大兵亟宜前進勦撫並
行機不可失大將軍簡親王同內大臣阿密達前鋒
統領希福等率每佐領十人并均配綠旗兵與大將
軍平南親王尚之信公同定議或取永州或宜取何
地相機而舉茶陵安仁永興郴州諸處俱令將軍穆
占鎮守如地方無虞有機可乘聽其酌量進發

丁亥總督姚啟聖等奏敗海賊於蜈蚣山恢復長秦
海賊偽統領劉國軒等大隊由海澄犯泉州敗
卻據長泰縣將軍賴塔等議留侍郎達都守漳
州而偕耿精忠及總督姚啟聖等率兵進討九
月十九日與賊戰於蜈蚣山賊敗走破其七營
斬偽總兵以下三千餘級生擒一千二百餘人
遂復縣城

己丑

金定四庫全書
卷四十二
詔福建總督提督綠旗官兵得專調遣

總督姚啟聖奏泉州見有閩浙提標綠旗兵二萬一千餘臣屢調會勦海寇迄今無一至者若必俟大將軍王令不免坐失機宜請

敕提臣馳赴漳州共圖戰守之策

上諭據報巡撫吳興祚提督楊捷等兵及滿洲大兵俱於十月初旬由泉州赴漳州如總督提督調用綠旗官兵必俟啓大將軍王未免遷延悞事嗣後一面調

遣一面啟知王等至總督提督皆朕信任封疆大臣
務彼此輯睦期于疆場有濟

辛卯

命大將軍貝勒察尼議取岳州之策

先是察尼令貝子彰泰攻湘陰將軍鄂爾以舟
師不可分遣止之彰泰等還駐九貴山至是鄂
爾奏九月十八日北風大作飄我君山扁山船
風稍息始得收集飄散之船賊乘烏船五十餘

乘間突出前往湘陰臣等未能擊卻比其還入

岳州又未能邀阻因請罪

上諭克取岳州所擊甚要以數百艘之船特遣將率師
斷賊餉道截其水路乃鄂鵠等目視賊船突出不能
阻截比其回歸又不能邀殺俾賊出入自如肆無畏
忌鄂鵠等即應嚴加處分但方統率大兵泊湖勦賊
俟事平之日嚴察重處鄂鵠及諸將佐俱令立功贖
罪今賊已多集糧餉火藥于岳州或仍應困取及作

何進發貝勒察尼等速定議以聞

丙申巡撫張朝珍請安置降兵于內地

上不許

朝珍奏各路軍前投誠官兵撥臣標効力者甚衆其間臧否莫辨請以臣標投誠効力各弁并嗣後自軍前發來官兵令分佈安插于江南河南內地

上諭今值勦撫並用之時若以見在武昌投降官兵安

置江南河南恐後此來歸者將疑畏不前大將軍順
承郡王貝勒察尼等其勿令若輩聚處隨宜分布安
置于湖廣諸處俾各得所

臣謹按投誠官兵本皆附賊之人一但勢威乃

始來歸雖其中傾心効順者固多而稔惡未
悛圖為不靖者亦自不少必處置得宜始可
以潛消奸狡之萌開廣招徠之路張朝珍珠
于事理請安插降兵于內地

皇上以無故遷移已至者必將自疑欲降者或困之中
沮若令聚處一方又恐叢集生奸致煩誅戮
有乖好生之德乃

命王貝勒等隨宜分布毋使羣居仍安置于湖廣諸處
俾各得所於是反側者咸安輸誠者益衆蓋
皇上措理之方安輯之道無事不盡善如此也

十一月己亥

詔授侍讀學士李光地為學士

將軍拉哈達奏海賊斷江東橋等處阻截援兵
有泉州守制在籍侍讀學士李光地遣人至臣
軍中為大兵鄉導由漳平縣朝天嶺小路入安
溪縣光地復遣人沿途修通險阻接濟軍需光
地身自前迎大兵文臣為國盡勞可否議叙

上諭李光地當閩地變亂之初不肯從逆具疏遣人密
陳機宜殫竭忠貞今又遣人迎接大兵指引道路平
險隘治浮橋餽食物餉軍率民兵備辦糧米供給兵

衆口糧矢志滅賊實心為國深為可嘉其從優授為
學士

詔予投誠官負俸

大將軍順承郡王勒爾錦言先後投誠偽官及
房縣來歸之偽總兵何以敬等雖授劄以示鼓
舞而止食兵糧生計難給

上諭何以敬等慕化來歸宜令得所以勵來者其悉予

半俸

甲辰

命侍郎禪塔海等監修岳州戰船

大將軍簡親王喇布奏臣今奉

命進征其船艘仍前修造或宜停罷統候

睿裁

上諭簡親王前言茶陵攸縣水陸俱達衡州諸處亟宜
預造船艦以備故特遣侍郎禪塔海等前往監造今
觀所奏如此足知從前初未詳審草率具奏宜俟事

平察議禪塔海可以所備物料運至武昌監修岳州
損壞戰艦

丁未

敕總督董衛國等速平餘寇

上諭兵部總督董衛國率師赴廣信勦賊已三月餘曾
否撲滅迄今尚未報聞總督提督封疆大吏楊一豹
等乃廣信一帶山谷小寇耳宜即為掃除總督董衛
國提督許貞其速靖餘寇各還駐所

辛亥

命遣官招撫陷賊官負兵民

上諭議政王等吳逆既殞賊心震動宜遣吳三桂原屬人負前往招撫山東按察使何毓秀等十員內擇數人量加職銜給以敕書發大將軍安親王簡親王順承郡王貝勒察尼公圖海將軍穆占莽依圖軍前或徑令彼等親往招撫或聽其遣人先通音問然後身往招徠其公議發遣儻有濟于事仍量功大小從優

議叙於是議政王等列毓秀等名具奏

上乃加山東按察使何毓秀太常寺卿工部郎中張光
岳太僕寺卿奉天府治中佟啟聖通政使司左
通政安丘縣知縣胡端通政使司左叅議行人
司行人崔啟元鴻臚寺卿武鄉縣知縣齊漳通
政使司左叅議各齎

敕諭往諸路大將軍軍前招撫臨賊官負兵民

敕曰自逆賊吳三桂煽亂以來所在官民多被誘惑故

陷身賊中莫能自拔朕已洞悉情形屢頒敕諭廣示
招徠開其自新之路今逆首吳三桂已伏天誅念在
彼脅從文武官負兵民人等皆朕赤子素受國家恩
養必非甘心從逆或志存忠義遲回待時或勢被迫
驅無由歸化朕甚憫焉茲特命爾等齎敕往陝西大
將軍長沙大將軍岳州大將軍征南大將軍揚威大
將軍荊州大將軍等軍前特行招撫爾等曩在滇黔
素多親識易于開導必相信從須宣布德音相機勸

諭務令陷賊人員翻然悔悟爭先來歸有密謀內應擒斬賊渠及率領兵民獻城納款者俱赦其前罪論功叙錄加恩安插俾令得所煌煌諭旨朕不食言爾等奉茲委任務須殫心籌畫勿失事機或親身徑前招撫或先遣人諭曉後乃親往俱同各將軍等會議酌量而行若招撫成功量功大小從優議叙加恩爾等其勉圖報効以副朕定亂安民至意

大將軍貝勒察尼奏舟師敗賊于陸石口

十月二十二日偽將軍杜輝巴養元姜義乘船
二百五十艘犯陸石口將軍鄂鷲等率師分擊
敗之獲其船斬賊無算至二十九日署副都統
葉儲赫等復率師進擊岳州破賊衆萬餘斬首
甚衆

甲寅

敕大將軍貝勒察尼等水陸圍岳州

察尼等奏賊艘雖兩番出城取糧據降人云取到

之糧僅支十一月頃賊船悉出意在疏通餉道
犯我柳林嘴鏖戰移時繼而偽將軍等率衆五
千於高家廟渡江犯我陸石口營臣因增遣署
前鋒統領杭竒率兵赴陸石口俾禦賊之出求
糧者

上諭岳州乃湖南咽喉如岳州克復則常德長沙之賊
斷難屯踞蕩平之績指日可期今湖水漸涸賊船難
出故由陸路奮死來犯苟糧無缺乏豈肯如此累出

衝突耶以風濤之險船艦將士雖有傷折然賊急迫之形已著貝勒察尼等速宜水陸圍逼務期克復

庚申調兵益大將軍貝勒察尼軍

先是察尼奏舟師泊湖以來頻經出戰礮多壞損請發江南發貢子母等礮一千送至岳州又以君山高家廟陸地設營請調荊州水營總兵官張忠并標兵赴岳

上皆從之至是又奏今湖水漸涸陸地漸出我兵營伍

隔絕恐賊潛通饋餉請增發滿漢兵議政王等
議不准行

上諭因取岳州關係重要據報賊糧將絕宜以閒地滿
兵量調岳州大將軍安親王遣赴永興每佐領兵二
人已經撤還今長沙事機稍緩可發每佐領兵或二
人或三人赴岳州江西總督董衛國標下官兵選調
二千五百人就近由銅鼓經武昌赴岳州營于要地
庶有裨于軍事此兵俱聽大將軍貝勒察尼等調遣

壬戌

命饒州總兵官高登科率兵赴茶陵諸處

大將軍簡親王喇布奏臣欽遵

上諭率內大臣阿密達前鋒統領希福學士薩海副都
統保住署副都統雅哈喇雅秦等并滿漢官兵
進討而留署前鋒統領薩克察巴圖魯副都統
馬席泰署副都統額思赫楊古岱等併滿漢官
兵于將軍穆占所俾之鎮守但茶陵攸縣諸處

接壤江西止以此兵鎮守力甚單弱而臣隊進討之兵又不便再留恐大兵長驅前進之後賊以大隊來犯地方不無可虞

上諭簡親王帥每佐領兵九人進征留每佐領兵一人防守江西總督董衛國提督許貞進勦廣信諸處餘寇建昌又有總兵官陳平駐守饒州逼近廣信董衛國等既撲勦廣信山賊其饒州總兵官高登科悉統標兵馳赴茶陵攸縣諸處協守

癸亥

命提督楊捷為昭武將軍仍管福建陸路事務調京口
將軍伯王之鼎為福建水師提督

先是總督姚啟聖奏水師提臣負缺奉

旨命臣等保題欽遵會同巡撫提督面議實無練習水
戰可堪保題之員

上命議政王等選舉至是議政王等列江南崇明提督
劉兆麒浙江溫州總兵官陳世凱名以奏

上諭楊捷自簡任福建提督勦禦賊寇恢復疆土勞績
茂著授為昭武將軍仍以原品管福建陸路提督事
務王之鼎才畧素優鎮守京口克稱厥職仍以將軍
調補水師提督

丙寅

命將軍覺羅舒恕遣兵赴藤縣

先是將軍額楚抵藤縣奏兵多病疫

上諭若病者未蘓可移師去藤至是額楚奏鬱林容縣

潯州賊衆聲言三路來犯大兵不可動移臣兵
病疫相仍見存無幾念臣深入廣西請增遣大
兵

上諭額楚仍駐藤縣將軍舒恕于南雄韶州兩處兵內
擇有馬者每佐領各一人發額楚軍

十二月己巳

詔增荊州綠旗兵

大將軍順承郡王勒爾錦奏臣所部滿漢兵水

陸攻取岳州竊犯荊州以圖牽制臣等即竭力
守禦亦難保無虞乞許臣募綠旗兵萬二千人
悉統槍手以濟防禦庶于疆圉有裨

上諭順承郡王既言荊州兵單宜如所請聽募綠旗兵
萬二千人悉統槍手并會同該督撫擇戮力行間有
才能者授職管轄兵丁所需交槍令工部選發如需
用輕礮王等具疏以聞

丁亥

金定四庫全書
卷四十二
救尚之信及將軍覺羅舒起帥師赴梧州

將軍莽依圖奏本月初三等日逆賊來犯將軍
額楚傳宏烈率兵接戰失利營壘俱陷賊勢猖
獗不能遏禦藤縣失守見存兵力甚薄梧州勢
危

上諭今梧州可虞大將軍平南親王尚之信不必往湖
南徑赴梧州與莽依圖等商酌調遣官兵併力勦賊
以靖地方如王斷不可離省即速選精兵馳赴又韶

州南雄已為內地將軍舒恕可率每佐領兵二人急
赴梧州至將軍額楚傳宏烈等現在討賊俟事平旋
師日察議

敕大將軍公圖海等議守肅州

將軍侯張勇奏河套彝人噶爾旦雖有與默得
里蒙古結姻之信但世為仇讐恐爭西海之地
甘肅兵單而臣且前赴秦鞏儻兩相戰攻內地
難保無事肅州當兩彛往來之衝宜增兵鎮守

上諭大將軍公圖海等身在地方輕重緩急是所悉知
應否調總兵官一員暫往鎮守肅州與總督哈占及
張勇公議酌行

庚寅以陳華等為總兵官

先是偽將軍杜輝遣偽叅將林寧等奉書請降
大將軍貝勒察尼等慰諭約期遣回至是詹事
宜昌阿奏本月十六日偽巴將軍下總兵陳華
李超率文武官弁兵丁家口投誠詢之續降人

負據稱是月十五日夜事泄吳應麒即潛拘同謀諸人十六日昧爽約杜輝議事伏兵執之訊至日中絞死偽總兵等數負及輝之弟侄親丁皆被殺

上諭陳華李超等感戴國恩與偽將軍杜輝共約歸順事泄杜輝被殺陳華李超等仍來投誠殊屬可嘉俱授為都督同知總兵官支全俸留大將軍貝勒軍俾招徠賊黨所屬官弁按原品支俸家口隨彼等所放

金匱要略卷四十二
安插得所復

諭兵部陳華李超外投誠官內擇語言明晰洞曉賊情者二人令隨詹事宜昌阿之筆帖式馬爾賽挈之馳驛來京

命總督董衛國率兵赴岳州

先是董衛國奏遵

旨進勦廣信逆賊楊一豹江機等屢擊敗之斬獲無算隨招撫偽都督陳得名等

上因命董衛國率兵往防銅鼓營至是衛國言銅鼓營
見今寧靜無事增防逆賊盤踞岳長臣願親領
標兵五千更調江西各營官兵數千赴楚効力

上諭總督董衛國以銅鼓營無虞願親率標兵赴楚効
力可嘉宜如所請統所屬官兵馳赴岳州多備火器
挨牌鹿角攜往擇賢能官留守江西酌調本省兵接
續前進其標下官兵勿令分撥他處聽自統全部以
行

欽定四庫全書
卷四十二
敕大將軍貝勒察尼等固圍岳州

詹事宜昌阿奏見今賊糧已絕偽屬官兵相繼
歸誠搜獲逆賊往來文書俱係調諸路逆賊援
岳之事今并賊書密咨兵部

上諭逆賊食盡勢窮調取援兵大將軍貝勒等宜約會
鎮守各要地將軍大臣嚴緝奸細俾賊內外音問不
通固我營壘以禦來援之賊務期克取岳州并檄趣
江西總督董衛國速行馳往

乙未趣尚之信帥師馳赴梧州

將軍莽依圖奏臣檄大將軍平南親王尚之信
親身率兵來援梧州之信報稱見赴湖南會勦
正慮調取之兵不能即至更有何兵可遣臣思
梧州乃廣東門戶逆賊近屯榕樹灘如不遣之
信來援則地方深為可慮

上諭頃已有旨命尚之信不必赴湖南今莽依圖既以
梧州勢迫為言尚之信其親統官兵馳往梧州勦禦

逆賊

許大將軍公圖海來京陳事

圖海奏臣年老欲密陳所見有不便具疏者今
秦省諸要隘守禦已固省會備有援師臣欲輕
騎赴京一覲

天顏面奏事宜下議政王貝勒大臣集議議政王等奏
軍機事宜主帥無親身來奏之例

上諭圖海攜大將軍敕印前來烏丹仍佩其將軍印暫

統大兵已而圖海來京密奏訖

上面授機宜隨令馳還軍前

平定三逆方畧卷四十二

欽定四庫全書

平定三逆方畧卷四十三

康熙十八年正月乙巳調總漕帥顏保等標兵赴
南雄

將軍覺羅舒恕奏南雄府為兩廣咽喉三省接
壤見在滿漢官兵無多南安諸處又安插新附
之人一有不測全省皆屬可虞

上諭漕運總督帥顏保總兵官哲勒肯各選標兵一千

人令賢能官負管轄速往南雄府到日令副都統博
霖總統防守地方

戊申增設岳州隨征總兵官

大將軍貝勒察尼疏言調往岳州兵六千人宜
設隨征左右前後四營各以總兵官領之

上從其請以副將李師膺為湖廣岳州隨征左營總兵
官柯彩為隨征右營總兵官都督同知陳華為
隨征前營總兵官李超為隨征後營總兵官

辛亥趣尚之信等速援梧州

總督金光祖奏廣西藤縣失守逆黨愈肆狂逞
水陸三路逼犯梧州

上命大將軍平南親王尚之信將軍舒恕即遵奉前旨
親統官兵倍道速援梧州

壬子

命大將軍簡親王喇布選發騎兵赴長沙

喇布奏永州耒陽請停進勦選臣等兩股兵內

有馬者每佐領三人遣往岳州

上諭此兵不必發岳州令于自京發往護軍驍騎內簡閱有馬堪用者每佐領二人以大臣一負統之速往長沙軍前命總兵官高登科留駐饒州

先是議調登科率其標下官兵協守茶攸諸處至是巡撫佟國禎奏逆孽攻陷德興侵逼樂平府縣有司力請留鎮臣駐守饒郡

上命登科及部下官兵不必調遣湖南仍留饒郡與諛

巡撫提督等共商速復德興務滅逆寇

丁巳增設荊州隨征總兵官

大將軍順承郡王勒爾錦奏新增兵一萬二千人應設四鎮各分管兵三千

上從其請以副將葛秉貞為湖廣荊州隨征前路總兵官蘭泗為隨征左路總兵官姚珩為隨征右路總兵官胡世英為隨征後路總兵官

乙未大將軍貝勒察尼等奏復岳州

時逆賊吳應麒等竊踞岳州堅壘死守

上命多調船兵飭令察尼等水陸圍困斷其糧道逆賊
勢蹙偽總兵王度冲偽將軍陳珀等于是月十
八日各以其舟師來降吳應麒等棄城逃遁我
師遂復岳州察尼及詹事宜昌阿以

聞

上諭大兵既取岳州逆賊震動之際諸路大兵宜勦撫
並用速行平定其令大將軍安親王簡親王順承郡

王將軍穆占等乘賊此時震驚有悔過投誠者寬貸其罪叙功錄用其宣布恩意兼施勦撫毋失機會酌量而行

臣謹按善用兵者必先爭要害之地若據有要害則其他不攻而自破

皇上洞悉方隅形勢以為掃靖寇氛蕩平雲貴大勢所繫實在岳州故于王師初出之時即

命都統覺羅珠滿等速赴岳陽控扼要地以遏繫賊寇

而珠滿等遂巡逗撓致岳城失守

皇上乃授貝勒尚善為大將軍統率勁旅恢取岳州又
屢授機宜趣令尅日進攻既因陸路之賊防
守頗堅特遣大臣亟營戰艦大集諸路官兵
據江湖之險斷賊餉道尚善等猶諉托多端
謂兵艦即鱗集湖中亦不能困賊迨入湖之
後將軍鄂爾等又以風濤洶湧請撤水軍賴
皇上乾斷獨持不允其請復調益舟師授策于察尼增

營要地圍困加嚴于是賊糧始盡至于饑蹙
棄城遁走岳州既得遂成破竹之勢而長沙
常德諸郡賊不能守一時奔潰貴州雲南以
次抵定矣所以削除寇亂克奏武功者誠由
我

皇上力排羣議獨運神謨專意規取岳州之所致也

庚申增設廣東潮州官兵

提督侯襲爵奏潮州與閩接壤逼臨大海諸島

逆孽窺伺汎兵力單請如舊復設潮州鎮標中
營官兵五百有餘及大埔營官兵六百潮州水
師總兵官一員並左右二營官兵二千以資彈
壓

上允其請以候補總兵官劉顯芳為廣東潮州水師總
兵官

甲子

敕大將軍貝勒察尼分兵速取湘陰

上諭兵部頃者筆帖式馬爾賽去時令其傳諭主將克
取岳州之後應發兵一支從京口河渡江立營于華
容石首之地以為根本若由華容石首前赴常德澧
州則水潦難將軍輩亦曾奏言此路水澤甚多艱于
前進已經飭示今在岳州滿漢官兵甚多宜乘賊
未暇固守湘陰水陸亟進乘機克取湘陰即望長沙
進發稍一遲疑觀望則江中有一洲直對湘陰賊堅
守縣城而立營洲上預儲火器得為嚴備我舟師欲

度難甚故不可不乘賊未及堅守之先急下湘陰也
岳州地最險阻偏師足守其取湘陰往長沙宜令貝
子彰泰署前鋒統領杭竒率每佐領滿洲甲兵十人
提督桑額總兵官萬正色躬率標兵併多發綠旂兵
丁整備大礮鳥槍火器水陸並發可速行大將軍貝
勒亦令安親王知之

乙丑

詔議政大臣等直陳勦賊事宜

上諭大學士索額圖等今正勦滅逆孽之時議政王大
臣等如有確見勦滅逆寇事宜及應行應革之事各
抒意見即于會議之所共議以聞庶便酌量採擇爾
等其傳諭議政王大臣等于是議政王大臣等奏言
自用兵以來凡勦撫逆賊之事俱厯

皇上睿慮籌畫即行間諸將進止機宜亦無不仰賴
廟謨指授遵奉而行所以疆隅次第收復羣醜望風潰
遁雖餘孽竄入滇黔即日自爾銷滅是

聖明謨畧周詳悉已盡善臣等實無他見苟有一得之

愚寧不陳奏耶

二月丙寅朔將軍莽依圖等奏敗賊于梧州逆賊

吳世琮等侵犯梧城于正月初六日水陸齊進將

軍莽依圖傅宏烈等率滿漢官兵拒戰大敗賊衆

多所斬戮是夜賊棄營而遁

命發馬于大將軍貝勒察尼軍前

學士額庫禮奏今我兵進勦請以武昌備養馬

匹撥至_臣等軍前

上諭大將軍貝勒察尼等恢復岳州向前進發其以武昌備養馬匹撥送一千酌給兵士無馬者

己巳大將軍安親王岳樂等奏復長沙

時岳州恢復長沙逆賊震恐不能久立于正月二十九日棄城潛遁我師遂入城安撫人民

命大將軍貝勒察尼遣滿兵速赴長沙

安塘筆帖式報大將軍安親王已復長沙今亟

金定四公全書
卷四十三
進取衡州移咨大將軍多羅貝勒令酌烏船沙
船及官兵貝勒遂遣自荊州來水師營總兵官
張忠等率綠旂官兵三千八百沙船一百快船
八十前赴長沙

上諭賊失岳州長沙諸要地正當驚惶騷動之時乘機
進取衡州擊滅逆賊殊為要務宜將岳州所有大兵
并船礮速行多撥增發大將軍安親王軍前大將軍
貝勒察尼等除先遣總兵官張忠標兵外今更速發

滿洲大兵多撥船礮迅赴長沙既而安親王岳樂等
奏賊離衡山縣二十里許水陸立營

上復諭宜乘賊寇驚動之際速取衡州此勦滅衡州賊
衆較諸處不同所調岳州舟師火砲早至一日于大
事有一日之益若緩至一日于大事貽一日之害調
遣船礮官兵如或稍遲使賊江中置樁預為堅守阻
我舟師致進取衡州事機有失則皆貝勒察尼悞之
也諭到貝勒察尼即撥舟師火器速發安親王軍前

於滅賊機宜勿致有悞其大將軍簡親王等亦已率
兵進取衡州兩軍相合之後總用大將軍安親王印
信協力勦滅逆孽恢復衡州諸路如有分兵之處仍
各用大將軍印信施行

甲戌

詔責大將軍貝勒察尼等

時賊渠吳應麒等從岳州遁去輔國公溫齊等
率兵追殺二百餘里陣斬甚多我兵因未攜爨

具而還察尼等以

聞

上責之曰逆賊吳應麒等迫于饑餓徒步敗遁我騎兵
追躡二百餘里因未攜爨具遂爾還師並未大創賊
衆岳州雖得不過賊所棄之空城而窮寇吳應麒究
未擒斬朕心未愜今以追殺賊衆地方里數詳度之
虛實即立見矣

命尚之信等速定廣西

之信等奏臣等共議將軍莽依圖舒恕等同將

軍傅宏烈守梧州臣駐封川縣總督金光祖

駐肇慶府將軍額楚等駐德慶州如有機會一

面奏聞一面舉行

上諭今長沙岳州諸處俱已恢復偽將軍總兵文武官
員船艦兵卒來歸者甚衆又據塘報彝陵州對岸之
鎮荆山盤踞賊寇盡行潛遁分逐諸路潰敗之賊多
所斬戮大將軍順承郡王等已渡江平定湖南安親

王又進取衡州諸處宜乘此各路賊寇渙解之際平定廣西大將軍平南親王尚之信將軍莽依圖舒恕額楚傅宏烈總督金光祖等勿失事機速定廣西

乙亥

詔總督董衛國率所部兵赴大將軍安親王軍前

先是議令衛國率兵往岳州至是巡撫佟國禎疏言岳州既復請撤還督臣

上諭江西屬在內地可以無虞今董衛國不必詣岳州

率其標下官兵速赴大將軍安親王軍前聽王調遣
協力進取衡州諸處

庚辰

命發馬于大將軍順承郡王勒爾錦軍前

勒爾錦奏臣兵在彝陵諸處更番來往水土不
宜致馬多斃請以近地所備馬速行撥給以資
進勒

工諭茲正前往征勒之際于武昌預備馬內撥一千匹

委才能官員速送大將軍順承郡王軍前

辛巳大將軍順承郡王勒爾錦奏官兵復澧州

勒爾錦聞岳州賊潰即遣署都統多謨克圖等

率師前進于正月二十七日渡江太平街虎渡

口諸處賊寇悉皆潰遁王率大兵于二十九日

渡江次元始于是前隊官兵分路追勦松滋枝

江宜都諸縣及澧州以次恢復守百里洲偽將

軍洪福率舟師繳印劄來降

敕大將軍貝勒察尼與順承郡王勒爾錦合兵進取常

德沅州鎮遠諸處

上諭議政王等曰今岳州彘陵之賊以舟來降長沙之賊焚舟潰遁諸處賊寇因感逃竄無有舟楫宜固守荆襄乘此機宜速滅賊黨貝勒察尼酌留官兵于岳州水陸齊進速會順承郡王軍合力亟取常德沅州鎮遠諸處至恢復常德諸郡之後順承郡王貝勒察尼等會同安親王簡親王等作何進取雲貴定議具

奏其大兵進討雲貴宜設將軍總督巡撫提督隨大
兵征進吏兵二部開列應補者以聞尋吏兵二部以
應補官列名具奏

上諭雲南將軍不必添設可調湖廣提督桑額為雲南
提督湖南提督趙賴為貴州提督四州總督周有德
為雲貴總督以原任巡撫李天浴為雲南巡撫副都
御史楊雍建為貴州巡撫

壬辰大將軍順承郡王勒爾錦等奏官兵復常德

是月十四日勒爾錦抵澧州遂遣固山貝子準
達等率領官兵進取常德未至之先賊縱火焚
城中廬舍并江中船艦而遁偽按察使陳寶倫
等迎降我師于十八日入常德府城

甲午大將軍簡親王喇布奏官兵復衡州

喇布率大兵前進于是月初七日復衡山縣遂
令前鋒統領希福等率官兵攻取衡州逆渠吳
國貴夏國相等聞風棄城而遁十三日我師復

衡州府城

命總兵官哲勒肯為廣西提督

總督金光祖奏廣西護設提督轄本標官兵四千六百餘人自馬雄變後未及復設當此用兵之際必仍設提督總統水陸之兵于戰守有賴其提標應設官兵即于廣西見在各營抽撥補入經制

上從其請授哲勒肯為廣西水陸提督總兵官

王以在故道世謂言無城而善者其詳樂無事三

八時時以三之也

其知制教其清矣

之期必與於此

一十九百餘人

其於女以心

其六

平定三逆方畧卷四十三

欽定四庫全書

平定三逆方畧卷四十四

康熙十八年三月丁酉以王度冲等為總兵官

大將軍貝勒察尼奏偽總兵王度冲等統官兵
船艦投誠宜從優議叙又言伊等願改為陸兵
効用

上諭偽總兵王度冲偽將軍陳珀可為總兵官俱兼右
都督偽總兵龍韜張宣柯喬棟等可為總兵官俱兼

都督僉事令彼等俱入陸路同大兵効力

甲辰

命彞陵總兵官徐治都為湖廣提督

兵部奏湖廣原設提督一員康熙十七年因江

西撫建提督趙賴調赴攸縣勦賊授為湖廣提

督今長沙諸府已經恢復湖南提督員缺應行

裁去湖廣仍設提督一員

上允之因授治都為湖廣提督

庚戌

勅大將軍安親王岳樂帥師進取寶慶諸處簡親王喇布等合兵進定廣西

上諭議政王等今湖南賊寇悉已敗遁順承郡王與貝勒察尼等合兵一處簡親王方在衡州穆占已至永州進取廣西事屬最要順承郡王等所部兵為數甚多可撥每佐領護軍二人驍騎二人令貝子彰泰率往安親王軍前安親王親統大兵前赴衡州進取寶

慶諸處簡親王可與穆占等合兵自永州進定廣西
甲寅總督姚啟聖奏報偽總兵廖瑛等來降

時廖瑛黃靖等率衆踞水晶坪聯絡山海賊寇
以為邊害姚啟聖遣官往撫之廖瑛等即率偽
官三百餘員兵一萬二千餘人詣軍門降

丙辰將軍穆占等奏官兵復永州道州

時賊渠吳國貴等遁往永州為守城計穆占遣
官兵追及之於白水市諸處擊敗賊衆斬殺甚

多是月初九日遂復永州於是道州永明江華
東安等縣所有之賊聞風俱棄城而遁

詔統兵將軍大臣等確覈戰功

上諭兵部曰我國家開創大業軍法最為嚴明凡擊斬
賊衆攻取城池必據實奏報復行確覈功罪昭著故
能信賞必罰鼓勵戎行初無虛偽冒功之弊今自用
兵以來每覽各處奏捷章疏其中固有實建功績者
亦有虛詞妄報者如擊敗賊兵動稱斬殺甚多或云

數千或云萬餘或云不計其數甚至賊棄空城或云如何攻取如何恢復妄行虛報微功小寇任意鋪張議叙之時冀幸濫邀陞賞殊非人臣事上勿欺實心為國之誼嗣今諸領兵大將軍督撫提鎮等務洗心滌慮勿蹈前轍凡報捷必確覈功績據實上聞如因循陋習濫軍功定以軍法從重治罪必無寬貸爾部即通加嚴飭并曉諭官兵一體遵行

丁巳大將軍簡親王喇布奏官兵復寶慶

衡州諸郡既復喇布即令提督趙賴率所部官兵往取寶慶府趙賴等未至賊先於城內外縱火而遁我兵遂於是月初五日入城

癸亥趣大將軍順承郡王勒爾錦速統兵進剿

上諭兵部曰逆賊從湖南敗遁日久我大兵隨後尾擊若推諉逡巡不速行追躡俾賊復得固守則勞費倍多乃順承郡王等至今猶未亟進殊為不合爾部速移文順承郡王等乘賊守備未固兼程前往

四月庚午

命諸將遣人招撫賊中渠帥

提督趙賴奏逆賊胡國柱郭壯圖吳國貴吳應
麒輩嫌隙已生互相陵轢勢不兩立宜乘渙散
之會指名招徠

上諭諸路大將軍將軍等乘逆賊互相猜疑之際其明
諭以投誠人員寬貫前罪從優恩擢賊中渠帥分路
遣人指名招撫

辛未

勅固山貝子準達等防守荊州彝陵諸處

安塘筆帖式報偽將軍王鳳岐等三人選船艦
兵卒水陸齊下截禦巴東諸處以乘不備又有

劉李楊王諸賊帥率衆屯踞巫山及草毛諸處

上諭逆賊巫潛生奸計或窺伺夔山俟江水泛漲時
乘虛突犯彝陵荊州殆未可定今固山貝子準達都
統根特等已率兵前赴荊州而彝陵又有大兵及提

督徐治都在彼宜悉錄報文移貝子準達等及提督
徐治都令於荊州夔陵諸處水陸密防賊衆來犯即
行勦禦

詔責都統覺羅巴爾布

大將軍順承郡王勒爾錦奏都統覺羅巴爾布
啟言二月初二日分兵二隊攻金頂山及灘內
所立之營兵鋒一至賊皆遁走隨遣署護軍統
領董吉等率兵由陸路追之及於南津關口江

北岸之賊列陣迎拒我兵敗之斬殺甚衆

上諭國家軍令本甚嚴明凡攻遂賊寇大臣身在顏行
是以官兵鼓舞奮勇野戰必勝攻城必克所向無敵
都統巴爾布統兵駐彝陵大兵既復岳州不於賊方
震動之時偵察虛實即行勦滅乃稱二月初二日分
兵二隊攻金頂山及灘內所立營兵鋒一至賊悉遁
走身統兵衆逼賊而營對壘之賊已遁尚爾不知又
不自思贖罪率官兵疾追殄殲賊醜止遣董吉等前

往巴爾布自率兵赴荆以來曾無奮力報効遲悞觀
望其罪良多既至彝陵與賊對壘不躬親拒敵反云
初二日撥兵前進作攻戰之形明屬欺罔且鎮荆山
之賊適於何處踞於何地並未察明以報順承郡王
等一一嚴取供詞以聞

戊寅

命發馬於將軍穆占軍前

時穆占奏自辰州啟行追賊二十日會大雨泥

潭馬斃甚多致兵士乏騎

上諭穆占與大將軍簡親王進定廣西宜速撥武昌馬千匹送至穆占軍前以給乏馬兵士

已卯

詔責大將軍順承郡王勒爾錦等

勒爾錦等奏偽將軍胡國柱在辰龍關偽將軍吳應麒等在辰州而近以木塞隘口而營

上責之曰順承郡王勒爾錦等當逆賊驚遁之際宜亟

遣賢能將帥追勦乘賊不備速行撲滅乃明知巴爾
布怯懦令率官兵前取辰州巴爾布遲滯觀望延引
時日不疾驅而進致辰龍關復為賊守勒爾錦巴爾
布等宜即行議處但見統大兵征勦俟事平凱旋之
日再行察議

壬午

勅大將軍簡親王喇布等毋進廣西將軍莽依圖等分

路進兵

上諭議政王等曰覽學士孔國岱報廣西悉已底定宜速
移文令簡親王及穆占等之兵不必進廣西但莽依
圖舒恕額楚等兵力稍單簡親王及穆占等兵內選
有馬精兵每佐領三人或四人遣前鋒統領希福帥
赴莽依圖等軍前於通雲貴要路宜從何路協力前
進公議進發至於廣西見無官兵平南王或宜同大
兵前進或宜駐廣西適中要地亦同將軍大臣等共
議而行其彛陵兵徒爾坐守似屬無用宜整繕甲兵

自歸州巴東作進兵狀以制之巴爾布本在夔陵即遣彼往歸州巴東効力并令都統噶爾漢等率兵同總督楊茂勳提督佟國瑤等前進宜由何路協力撲滅山賊或規取興安聽其酌便而行

乙酉

頒勅招撫雲貴官民

勅諭雲南貴州大小文武官員軍民人等逆賊煽亂以來爾等被其迫脅陷身賊中莫能自拔地方百姓久

遭荼毒誅求苛擾困苦日深在彼情形朕已洞悉每
一念及深為惻然故屢頒勅諭廣示招徠開以自新
之路今湖南悉皆平定廣西亦已納款獨爾滇黔一
隅民生尚在水火之中朕以仁覆天下為心豈忍西
南萬姓顛連無告莫之拯救且當時倡叛罪止三桂
一人所屬人員均係脅從情可矜恕今特頒勅諭再
行招撫爾等其各體朕寬大好生之心翻然悔悟爭
先來歸於各路大將軍將軍等軍前投誠皆赦其前

罪論功叙錄加恩安插令之得所爾等勿得仍懷疑
畏坐失事機有負朕嘉與維新至意

丙戌

諭諸路將帥毋受祖澤清降

上諭兵部曰逆賊吳三桂煽亂以來諸大小文武官員
勢窮力竭迫而從賊朕久已洞悉其悔罪來歸者槩
行寬宥惟祖澤清父子兄弟向受國家恩養甚厚前
澤清叛時意其必係被賊迫脅不得已而從逆及其

既降復叛則甘心附賊可知情罪重大國法難容不許招撫亦不許其投誠爾部即密諭各路大將軍將軍督撫提鎮等遵行

總督金光祖奏復潯州

時逆賊吳世琮等踞潯州府聞大兵前進即焚營棄城而遁金光祖等所遣副將林大忠遂於是月十九日入城撫定人民

詔保全文武官員家口陷賊者

上諭兵部湖南廣西已經底定滇黔指日蕩平凡在京
在外大小文武官員內有家口陷於賊中者有子身
投誠家口仍在彼地者有前以抗賊被害而家口尚
有遺留者大兵到日一一清察務加保全俾之得所
聽其家屬完聚爾部即通諭各路大將軍將軍督撫
提鎮等遵行

丁亥

命刑部侍郎宜昌阿等赴湖南議撤兵事宜

上諭兵部今湖南廣西皆已底定大兵多集湖南遣侍郎宜昌阿學士噶爾圖赴順承郡王安親王簡親王軍前酌留進勦平定地方之兵餘兵防守荆岳及蒙古烏拉寧古塔兵應行調還事宜一一詳議速奏其招撫勅諭費付大將軍等令其酌行招徠伊等不必留彼招撫軍事議畢即還

壬辰

命大將軍順承郡王勒爾錦等還荊州貝勒察尼帥師

進勦

勒爾錦奏將軍鄂爾等啟稱署副都統圖爾篤
渾等偵探辰龍關賊情形賊跨路連設五營力
為堅守山險林深前鋒未得禽獲生口距辰龍
關二十里止行一馬且不能轉旋辰龍關一帶
山俱峻險林木森密徒步亦不易至且時值盛
暑淫雨雖大兵前進亦不能行不如暫留為便
上諭辰龍關乃通雲貴孔道衆皆知之甚悉據奏辰龍

關相去二十里止行一馬且不能旋轉辰龍關一帶
山俱峻險林木森密徒步亦不易至俟復辰龍關時
必於此路明白丈量苟與所奏不符圖爾篤渾等從
重治罪今當廣西全定敗賊逃散之際宜分路前進
底定疆圉前鋒屬在顏行捕獲生口乃其專責順承
郡王委無能之圖爾篤渾為副都統俾之前行致前
鋒不能捕一生口圖爾篤渾等乃又急行退還順承
郡王勒爾錦可率其王府佐領之兵還赴荊州同巴

爾布等進定歸州巴東圖爾篤渾可革去署副都統
職以叅領隨順承郡王還荆貝勒察尼仍用其原大
將軍印統兵平定地方

平定三逆方畧卷四十四

欽定四庫全書

平定三逆方畧卷四十五

康熙十八年五月乙巳

命調福建水師提督伯王之鼎為四川提督

時

上以湖廣岳州水師總兵官萬正色諳習水性令其進
勦海寇特授為福建水師提督故以之鼎調補

四川

丁未

詔理事官麻勒吉赴廣西暫轄定南王所屬兵士

將軍穆占奏廣西省城投誠偽將軍劉彥明徐
洪貞線成仁等仍為都統副都統領其總轄藩
下及綠旂之兵頗于事有益

上諭劉彥明等所領投誠綠旂兵內有願歸農者皆令
歸農願入伍者撥入廣西經制兵內其定南王下舊
兵有老弱者裁去不必足從前三千之額數年以來

定南王官兵分散各處收聚甚難宜令督捕理事官
麻勒吉前赴廣西暫行統轄定南王下藩兵有分散
者令其察訪料理一切調度軍務會同將軍莽依圖
等高議舉行其廣西文武各官弁定南王下各官職
名麻勒吉俱察明繕冊以聞劉彥明等為都統副都
統之處俟冊到日再議

辛亥遣副將徐升耀賚

敕招撫王屏藩等

時升耀言願往招撫王屏藩吳之茂譚洪張起鳳等

上命加升耀都督僉事賚

敕招撫

諭王屏藩等勅曰自吳逆煽亂以來所在官民多被誘惑陷身賊中莫能自拔朕已洞悉情形屢頒勅諭廣示招徠開以自新之路念爾素受國恩必非甘于從逆或心存忠義遲回有待或勢被驅迫歸化無由朕

甚憫焉茲湖南廣西俱經恢復各路兵馬齊進滇黔
爾所悉知四川一隅皆朕赤子久懼兵燹不得早見
太平每一念及殊多惻然特遣副將加都督僉事徐
升耀前往宣布朕意爾其翻然改悟勿失機會率先
來歸朕必赦其前愆論功叙錄爾無懷疑畏勉圖後
効以副朕定亂安民至意

癸丑

命遣官採購湖廣糧米運赴廣西

時因廣西官兵乏糧議政王等議請令兩廣督撫由廣東設策運糧

上諭不必自廣東輓運令遣戶部賢能官二員採買湖廣米運至廣西軍前其湖廣武岡諸處官兵亦令料理備辦

已未

命大將軍貝勒察尼治澧州以南軍事大將軍順承郡王勒爾錦治荆岳彝襄諸處軍事

察尼奏臣等前進荆岳彞襄諸處相隔漸遠調遣防守事宜必致有悞

上諭大將軍貝勒察尼等親統大兵往前進勦自澧州以南軍務聽大將軍貝勒察尼調度荊州岳州彞陵襄陽等處軍務聽大將軍順承郡王調度

辛酉調大將軍簡親王喇布等兵赴桂林

將軍莽依圖奏桂林相近之兵請速調一支往

駐桂林以張聲勢臣俟副都統額赫訥兵至貴

縣即前赴橫州以絕柳州南寧之路因遣人趣
馬承廕郭義等速行薙髮

上命簡親王及穆占等兵內撥每佐領三人或四人遣
一副都統率赴麻勒吉所令麻勒吉等統轄鎮
守桂林

六月戊辰

詔雲南提督桑額率湖廣官兵進雲貴

桑額奏新任湖廣提督暫駐彝陵請以彝陵官

兵隸其標下而湖廣提標官兵姑屬臣統領

上諭提督桑額隨大兵進取雲貴其湖廣提標官兵准
入雲南提督標下俟底定之日仍回楚中桑陵鎮標
官兵准為湖廣提標至于隨桑額前往官兵方事勦
賊收疆標下官員可各加銜一等兵卒可動正項錢
糧賞賚以示鼓勵

壬申

詔誅叛弁趙天元

尚之信奏粵東之變起自新會江門江門水師
之叛由于天元一人請以天元賜臣使得明正
其罪立置典刑

上諭趙天元不思圖報國恩乘粵西逆賊侵犯粵東首
獻江門背叛致粵東變亂及粵東歸順後又從逆賊
數犯疆圉今度不能免脫窘困至極方始來降情罪
重大趙天元本係平南親王所屬之人王其立誅之
甲戌削都統覺羅巴爾布職

大將軍貝勒察尼等取巴爾布供辭以

聞

上命議政王貝勒大臣集議議政王等奏言都統覺羅
巴爾布自率大兵往湖廣以來並未前進効力
因其怯懦削去叅贊令其贖罪圖功乃身率大
兵坐駐彝陵大兵既復岳州不乘賊中震駭之
時探其虛實力行勦滅以贖前愆鎮荆山對壘
之賊迄于逃遁竟未之知乃誑云分布官兵進

攻巧為飾辨又不親身追殺逸寇止遣夸蘭大
二人前往其後令巴爾布率領官兵攻取辰州
又遲回瞻顧遷延時日竟不速進致賊復踞辰
龍關得為守備巴爾布怯懦退縮一步不能前
進貽悞大事失機甚多今奉

旨取供巴爾布又不即行認罪據實供招反為巧飾殊
失大臣之體宜將巴爾布都統阿達哈哈番佐
領及所加之級盡行削去羈繫荊州彼所襲其

父拜他喇布勒哈番與應襲之人承襲

上報可

乙亥大將軍順承郡王勒爾錦奏請增兵

上責之

勒爾錦奏前者渡江已簡兵士有馬者攜往所
留守彝陵諸處兵並屬頂補多係無馬今平定
疆土兵力單弱請悉以所有前鋒護軍調益

臣

軍

上諭前令順承郡王等固守荆襄諸處而順承郡王遣
貝子準達都統根特等率兵前守荆彝今撤還順承
郡王至荆彝令平定歸州巴東乃復請益前鋒護軍
惟予身之所在必欲厚其兵力所奏殊屬不合念見
在進兵平定疆土除將軍噶爾漢等所統進剿兵外
其荆彝諸處所在之兵許酌量調往

戊寅尚之信奏偽將軍馬承廕等來降

承廕于五月二十六日率偽將軍郭義偽總兵

齊人龍及偽文武官繳勅印來降之信以

聞

壬午將軍噶爾漢奏暫撤還大兵

上責之

噶爾漢奏臣等率領官兵逼臨賊境見山高路
狹小谿甚多草木叢塞今值六月時多靈雨若
山水暴下則魚貫之兵必至斷絕不能相顧矣
且挽運亦難是以暫撤兵衆俟木落水涸更率

官兵先滅山寇續取興安

上諭噶爾漢自任將軍以來初無勞績惟閒住襄均諸處今當逆賊震動之時遣噶爾漢會同提督等勦滅山寇或有克取興安之機酌便而行乃不率兵破賊以圖報効反稱草木叢塞竟以兵還若此當草木未盛之先亦曾効力前進否噶爾漢不行努力以贖前愆反規避退兵殊屬不合即行嚴察議處但見在統兵進勦俟大兵旋日察議又近日陝西大將軍圖海

奏稱四川逆賊出寶鷄立營則興安之地已空噶爾
漢其統兵而前擊破賊寇規復興安諸處毋失機宜

甲申

詔大將軍簡親王喇布等罷發桂林兵仍與安親王岳

樂約兵勦賊

先因馬承蔭郭義等尚未投誠

上命喇布及將軍穆占等撥每佐領兵或三人或四人
遣一副都統率往桂林至是喇布奏稱分兵發

往桂林鎮守永州則臣等所部進勦之兵力殊

單弱

上諭今馬承蔭鄭義等俱已投誠則平南親王及將軍
莽依圖等兵皆可達桂林簡親王等不必分兵發往
仍與安親王約勦殺賊寇

戊子

敕大將軍公圖海等速取漢中興安平定四川

先是提督趙良棟奏稱湖南已經平定應復漢

中興安臣願獨當一路展竭愚忠以圖自効

上命圖海等確議至是圖海等奏稱棧道驛門鎮各口
逆賊率衆來犯據險為營今令提督趙良棟進
臨武寨相機而行俟臣等擊破驛門鎮諸處賊
壘如有進取之機酌量分道而行

上諭湖南逆賊大敗困處遁走大將軍安親王簡親王
等三路進發平定武岡新寧諸處勦殺賊寇貝勒察
尼等進取辰州順承郡王及將軍噶爾漢等亦從鄭

陽彝陵規定蜀賊又馬承廕郭義等並皆雜髮廣西
已平平南親王將軍莽依圖等亦統兵進勦今逆賊
震懾正當勦撫並用之時大將軍圖海與將軍總督
提督等共議亟殲侵犯寶鷄之賊恢復漢興以平蜀
地

臣謹按蜀中山峻谷深道里阻陜地實至險
從來不逞之徒多據為窟穴不易削平是時
湖南逆賊潰遁諸路進兵

皇上料蜀寇聞風必皆震懼若不應機疾進使賊得屯聚一隅據守要害恐蕩平之績非旦夕可致

爰

命圖海等率師迅邁收復蜀疆迨圖海等奏稱賊毀偏橋道途有梗將軍張勇提督孫思克等又請姑止進兵

皇上概弗之許仍下詔嚴趣于是諸將帥始部勒士馬分路並發果奪其關隘殲厥渠豪蜀境悉平

直抵雲貴

皇上洞察賊形深悉機勢以萬全之慮為必勝之謀
睿畧淵謨誠諸將帥所不能仰窺萬一者矣

巳丑

詔撤福建內府佐領官兵

大將軍康親王傑書等奏閩中濱海要汛及墩
臺營寨俱綠旂官兵防守滿洲大兵惟駐形勢
之地相為聲援滿洲兵數頗多宜酌量撤還

上諭滿兵既云宜撤當如奏撤回但海氛未靖止先撤
內府佐領官兵一千俟此兵到日再議發往更代

庚寅

詔大將軍安親王岳樂等分路進兵

時侍郎宜昌阿等至湖廣傳

諭諸大將軍等酌議撤兵大將軍貝勒察尼奏言臣察

見在進征常德桃源護軍每佐領各五人有餘
驍騎兵每佐領各七人有餘漢軍共一千二百

餘人綠旂兵共二萬七千餘人其兵足以前進
所有在常德者外藩蒙古兵四百餘人在澧州
者外藩蒙古兵二千三百餘人應行撤還松滋
宜都驍騎兵五百人漢軍一百人綠旂兵四百
餘人足以鎮守疆圉二處所有外藩蒙古兵五
百人亦應撤還其在岳州滿兵每佐領各三人
有餘漢軍共三百餘人俱撤還荊州并入荊州
兵內共成每佐領五人之數俾之鎮守其餘滿

兵每佐領各二人有餘鎮守荊州外藩蒙古兵
二千餘人鎮守岳州外藩蒙古兵六百人亦俱
應撤還大將軍簡親王喇布奏稱烏拉寧古塔
之兵宜遵

旨撤還但新寧諸處見有賊寇請暫留烏拉寧古塔兵
一千二百餘人臣等二支之兵合而為一每佐
領兵各十一人有餘于其中選每佐領八人及
綠旂官兵一萬二千餘人率之前往與安親王

相期進勦新寧賊寇俟破賊之後烏拉寧古塔
兵即行撤還其永州宜撥滿兵無馬者每佐領
三人綠旂兵二千人鎮守令總兵官蔡元等率
綠旂官兵三千五百人鎮守全州其兩支外藩
蒙古兵一千七百餘人應行撤還大將軍安親
王岳樂奏稱臣所統護軍驍騎兵每佐領共十
五人蒙古兵一百餘人簡親王等既進取新寧
臣當率每佐領兵各十一人綠旂官兵一萬人

與簡親王相期進勦武岡東口之賊其衡州宜
留每佐領滿兵各一人綠旂兵一千二百人總
兵官張忠標兵二千人防守寶慶宜留每佐領
滿兵各一人綠旂兵一千人防守岳州宜撥每
佐領滿兵各二人前往與鎮守岳州綠旂官兵
協同防守其外藩蒙古兵應行撤還簡親王等
儻不進取新寧其前欲攜往進勦綠旂官兵一
萬二千餘人及得勝等礮祈發臣軍前以便攻

勦武岡新寧東口賊寇

上諭安親王兵可兩路進取武岡東口簡親王等兵與安親王兵約期進取新寧破新寧賊後烏拉寧古塔兵聽令發還貝勒察尼等兵攻取辰州等處蕩滅寇賊衡永荆岳諸地俱如所奏留兵鎮守其諸處撤還滿洲蒙古兵俱令大臣官員沿途嚴加鈐束

詔送馬至武昌

上諭兵部爾部見餉馬匹及營驛之馬可選擇二千如

例送至武昌令善加芻秣備用



平定三逆方畧卷四十五